

晦香續稿卷七

青浦諸聯星如氏撰

戰城南

戰城南城南鬼哭聲啾啾白骨塗地塞草死黃雲萬里天為愁今日毘帳兵明日沙場鬼生死未敢知殺戮以為技深山無人大塹生風殺人不多將軍無功將軍閣上名士卒草中瘞所以古人耀德不觀兵鑄劍戟為農器

臨高臺

臨高臺高臺下有江水寒天風吹來波漫漫我欲徑渡無羽翰憑軒兮遠望涕泗兮雙垂蘭有香兮君不知我今採兮將誰貽

艾如張

艾而張羅羅如雲雲中鴻雁離哉紛啾啾哀嗚呼其羣東有深淵西有大壑南北雜以矰繳使我不得騰躒瞻彼中阿可避網與磬亦集爰止得我所羅兮羅兮奈我何

上邪

上邪吾自與君相知相知在心人誰知之水可枯山可移天地合一骨化為泥維此一片心不敢與君相離

烏生八九子

烏生八九子。朝夕聲相呼。食則呼雛。息則呼雛。呼雛辛苦聲。嗚嗚哺得雛長成。長成不復念老烏。新烏翩然去。老烏惻然孤。空巢獨宿淚為枯。吁嗟返哺何時乎。

塞下歌

天山雪後鬱嵯峨。壯士歡聲盡擁戈。夜半前軍催上馬。銜枚齊渡白狼河。孤城莽莽陣雲開。日落轅門畫角哀。戰罷歸來齊解甲。望鄉不上李陵臺。

春夜

開戶滴零露。入室聞雨聲。瀟瀟四五點。知是微雲生。傾耳倏復止。但覺琴書清。微風弄鐙火。掩抑如有情。坐久不嫌寂。新詩還復成。來朝煩屬和。好鳥花間鳴。

四時詞用東坡韻

遊絲暖逐東風落。嬾入閒階罩珠幙。蝶夢香寒翡翠衾。鶯啼愁破胭脂萼。胭脂為腴玉為肌。欲寄相思知者誰。留得冶春無限意。夜深嬾卸翠雲衣。

湘簾未捲朱曦永。倦倚桃笙冰雪冷。竹影迎風窗外搖。桐陰漏日階頭靜。含情坐起雙蛾顰。開襟香汗珍珠勻。棹歌一曲不知處。蕩舟忘卻採蓮人。

芭蕉迎翠文窗綠。淒入商飈廢絲竹。天上空言鵲作橋。人間不信金為屋。待月盈盈

戶未扃。裊裊無語立前庭。夜來涼露侵衣袂。腸斷飄殘玉笛聲。
北風夜靜吹簾角。膩粉香消酒力薄。賓鴈沉沉叫月寒。鄰雞喔喔催星落。曉來呼凍
鬢邊鴉。一線紅潮褪臉霞。對鏡幾回情脉脉。空教瘦影泣梨花。

席上逢舊較書

窗外秋聲弗可聽。十年聚散感飄零。細談往事燈重剪。苦訂良緣夢未醒。杜宇分身
為怨鳥。楊花再世亦浮萍。相逢別有相憐處。不到更殘酒不停。

春日

春色到窗紗。閒情感歲華。柳翻鶯擲浪。桃漲水迎花。韻險賡逾妥。尊空市可賒。一椽
趺坐久。山外夕陽斜。

初三夜坐湧翠閣玩月

隱隱清光態尚新。輕雲纖捲淨無塵。須知十五團圓影。即是今宵半面身。

題桃源釣客圖

春山澹澹煙光逗。春波淼淼魚鱗皺。一樹垂楊萬縷絲。輕盈特把前溪覆。更有大桃
紅近人。濃華灼灼迎芳辰。幾枝影拂漁郎棹。數片霞遮洞口春。洞口白雲如有待。綠
蓑翠箬風流在。雙雙鸚鵡貼波飛。一曲漁歌聲欸乃。歌聲斷續聽來稀。碧裏船頭空

四圍淺水撈將蝦菜好。長竿釣得鰕魚肥。得魚應覓林間酒。獨對斜陽自搔首。雅意曾師谷口人。高情不讓蟠谿叟。我亦江湖老釣師。水蒔花裏去遲遲。何當同作浮家客。咏徧淞南漁具詩。

郊居

郊居寂無事。徙倚寒江潯。昨夜春雨足。開門湖水深。湖水深幾許。泉響流惜惜。遊魚亦復樂。波中浮且沈。以吾幽棲跡。感茲清淨心。村酒不能醉。浩歌滄浪吟。

懷愛筠

獨對空濛月。偏傷離別心。簾移花影碎。漏盡曉寒侵。好夢翻嫌短。春愁近轉深。相違隔煙水。悵望寄遙吟。

題邵西樵雲深採藥圖

君本尋雲客。曾撥閒雲問仙宅。繪得雲深圖。滿眼煙雲飛咫尺。披圖細認商山翁。笑折芸芝不忍釋。仙源遙在雲深處。手攜鴉嘴穿雲去。山迴路轉石徑紆。白雲細與瓊瑤俱。天台二女一笑逢。胡麻飯熟遙相呼。霞裙霧帶半空起。左手拍肩右手扶。或摘鍾山草。或採靈澤珠。或餌離婁桂。或採鈴杵符。金樓玉闕現雲漢。下看塵世何模糊。吾欲乘青雲。雲氣直上誰扶吾。吾欲採金芝。岱輿之山行紆徐。擬得神仙杖九節。空嘆

嵇康伴王烈。何當拚取幾兩屐。隨君白雲深處尋仙穴。

畫梅歌為約庵賦

春風一昔輕寒透。瓊姿粉蕊盈山岫。有人身比梅花瘦。日取梅花三百觴。昨向孤山山上走。笑問是否林逋曹。含毫偶寫凌霜秀。羅浮藏在雙衣袖。折得疎枝來訪舊。邀吾題詩即草就。吾却耽吟忘吾陋。斯謂有芬必有臭。

春日晚眺

蔣家三徑絕塵埃。臨水柴扉晚尚開。獨立斜陽延佇久。柳絲風裏颺春來。

夏閨

薰風自南來。吹得雙眉結。一夜石榴花。點點飛紅雪。

戲咏竹夫人

青奴名字舊曾知。冰簟銀牀擅一時。若解雨雲非勁節。不施朱粉定天姿。爭推華族同湘女。未必無言讓息媯。識得色空空即色。夜來便可慰相思。抱擁嬌娃也盡歡。孤衾曾否報平安。一生豈肯因人熱。五夜都能知我寒。專寵莫教侍女妒。芳姿任借別家看。虛心自是天生就。顛倒相從定弗難。

玲瓏胸次洵嫣然。不解炎涼別有天。青士便娟今入幕。此君風韻在橫眠。幾同作婢

終離俗。無復生孫大可憐。聞道王家偏愛汝。桃根桃葉果誰妍。
生長淇園知者稀。招涼館裏是相依。中雖空洞寧容物。質本輕盈不耐衣。棄去命同
紈扇薄。聘來價與綠珠違。他時零落同房老。一任湯婆占繡幃。

集水鏡山房送春分得五古

樓上子規啼。樓下桃花飛。留春春不住。紅淚沾春衣。春歸在何處。東皇不曾語。登高
極眇遠。芳隄落輕絮。我本傷心人。飲餞寒江濱。同遊共小住。悵望斜陽村。斜陽知有
幾。野寺疏鐘起。古來銷魂事。黯然別而已。況是送春人。今年三十矣。

贈織雲女士

吟成柳絮句生香。玉骨花容錦繡腸。檢點唐人三百首。可曾金縷唱秋娘。
三月鶯花筆底收。天然丰格最溫柔。憐君自有寫生手。寫到芙蓉不並頭。

十六夜待月

碧天無際路迢迢。悵望蟾輝隱紫霄。約我相思遲夜半。照人短夢盡今宵。究憐圓景
終難滿。不信清輝亦易消。為想高樓延佇久。斷腸無計弄金簫。

夏五同友至廉餘草堂聽伴霞彈琴

屐聲一路鳥驚起。城外徐行約三里。山陰道士善閉關。不許紅塵到山裏。忽然柴扉

開良朋雜沓來。避暑暑氣絕。竹韻來虛齋。良久抱琴至。清音絕塵思。吾非鍾子期也。識山水志。一彈淒以清。再彈不成聲。四座聽罷萬籟息。歸來日落蒼煙橫。朱絃一曲移吾情。淪淪餘韻薰風生。

題王述庵夫子三泖漁莊圖

誰云釣臺客。名不上雲臺。泖水平如鏡。扁舟挂席來。偶然攜網去。原是濟川才。予亦能高隱。投竿志未灰。

晦香居花卉雜詠

蘭

深山無人衆草綠。挺出奇姿媚空谷。紉來擬與訂同心。香氣霏霏襲春服。獨立常含絕世情。千秋點染離騷經。瑤琴彈罷悄無聲。楚山高。高湘水清。

蓮

穠華日出遙相向。閒情早倚煙波上。姑射仙人詩夢寒。隔水輕盈獨愁悵。嬌姿忽向涼風墮。亭亭愈覺增婀娜。果然玉立自天成。焉有污泥能浼我。

梅

天公憐我岑寂久。特遣寒枝作寒友。幾株散作籬邊春。消盡江南寒九九。世間何處

覓癯仙。雲膩煙橫。好消受。江城有客。最相思。玉簫。蒼茫。落疏牖。

菊

三徑羣芳扶不起。柔枝獨立濃霜裏。白華黃蕊何翩翩。倚那舊繁枝連綿。吾來載酒重陽路。滿庭瘦影紛無數。女几山下可延年。幽香何必傷遲暮。

梨

芳枝遙曳春無痕。嫣然洗盡人間塵。化作三更夢裏雲。澹煙疏雨招香魂。玉容含淚送殘春。卸妝斜倚江邊村。落花飛雪爭紛紛。一夜陰凝深閉門。

芍藥

力能殿得韶光住。絕色名花絢春煦。當階翻去瓊瑤枝。紅玉斲成樓參差。雕闌倚徧不忍折。欲贈伊人愁闊絕。維揚良晏悵無期。開到黃腰向誰說。

海棠

蜀都二月花無主。海棠睡去春如許。宛轉簾前不自持。一點芳心逗春雨。待到宵深慙可憐。金屋何年能貯汝。妖嬈合是號傾城。縱說無香亦千古。

桃

我生不問桃源春。門外落英何繽紛。繽紛萬樹看不極。蒼顏亦帶桃花色。奚童報道

花正開。胡麻飯熟。仙女來。今朝清睡猶未足。笑任東風颺紅玉。

水仙

銀屏細落瀟湘雪。晶簾輕捲玲瓏月。月中傳出美人魂。娟娟凌波自秀絕。秀絕名花玉盃陳。輕盈羅襪不生塵。香心暗逐瑤池影。一枕相思曉夢冷。

虞美人

英雄自古必好色。莫說佳人能傾國。千載芳魂枝上花。舞斷春風破春碧。春寒露重不勝情。翠翹紅袖何縱橫。虞兮虞兮夢未成。花下高歌無楚聲。

芙蓉

輕雲澹蕩凌滄波。錦城新剪嬌紈羅。倚權唱歌江上路。靚妝小婦爭相妬。纖影娟娟特愛涼。霜中飄出紅衣裳。孤根不向金風老。回頭笑指秋天曉。

抹麗

儂家藏雪翡翠樓。雪花飛上瑤釵頭。園人夜獻百寶珠。珠光直浸紅羅襦。侍女相尋不知處。捲簾問花花不語。睡起朦朧雙鬢香。午枕清涼滌煩暑。

石榴

空庭五月苦炎熱。薰風吹落猩猩血。嫩人偷折珊瑚枝。剪碎紅綃點羅襪。洪柯慘稔

含清芬。石家醋醋燒新雲。花光人影兩無痕。照眼迷離空斷魂。

木香

簾外不聞啼百舌。枝頭堆滿瓊瓏雪。雪光花影浸空櫺。香氣迷濛澈寒骨。花磚詞客詩思清。嚼碎玻瓈噴寶屑。朱門夜鎖靜無人。離離又弄纖纖月。

秋海棠

西風幾陣凍蝴蝶。牆角秋深露寶靨。喚起嬌魂問舊愁。盈盈猶帶湘娥泣。勸君莫作長相思。相思易老芳華姿。膽斜淺水自生綠。為我終宵伴紅燭。

薔薇

蠶喧蛺蝶駐春狼籍。野花帶雨嬌無力。料峭東風吹不得。一叢短刺鉤春色。買笑有金興正豪。香濃烟靄心魂銷。對客揮灑黃絲毫。叉手詩成賜錦袍。

題筠莊貝葉書經圖

吾生不解禪。頗能識禪意。蓮華六萬言。清淨作妙諦。筠莊個儻才。逃禪解禪偈。貝多葉正疏。手揮抑何麗。慧斐十卷書。傳鈔奚所濟。皇侶誦孝經。達人發妙義。雕談或翻譯。寫經乃遊戲。寄語寫經人。勿示楞嚴義。

銅雀古硯歌

古來神物宛有靈。割雲鏡玉銀帶成。馬肝龍尾等瑤瓊。死眼活眼殊分明。色翻霞彩浴波晴。蟾蜍弄影濕太清。二十六峯同列星。殺墨如風四座驚。端溪三種雖足矜。銅雀古研聲價增。陶人奇巧莫與京。澄泥濾過埏埴精。至寶留傳世幾更。愛玩直欲同連城。有客贈我紫翠屏。不須鸛鵒雙眼青。黼形穀理背有銘。云是曹氏之瑤瑩。貯水數日無燥形。風磨雨濯理緻呈。唯君研癖舊有聲。庶不累以三災稱。摩挲玉質手不停。感慨忽覺胸中生。當時吳蜀羣雄爭。當塗鄴下尤崢嶸。高高在上天日橫。綺羅臺上留豪情。至今剗靚看瓏玲。依稀歌舞還堪憑。霸圖蓋世一朝傾。破瓦翻得千秋名。

兒病

一夜渾無寐。兒啼聽惘然。嗟余心倍苦。幸汝病將痊。醫禱求神惠。撫摩實我憐。祇因為長子。情意更纏綿。

長女又病

昨日兒方泣。今朝女又呻。一心分兩地。百難萃吾身。遭際已如此。生涯況賤貧。遙憐婚嫁畢。鬚鬢白於銀。

哭紹初五弟

吾弟今何在。死生從此分。一朝成永別。對影悵離羣。存沒難言命。聰明竟誤君。蒼天

不可問。到此更何云。

抱病幾何日。參苓功有無。兩兄皆潦倒。

兼謂裕昆弟

一弟致天徂。天意誠難測。人生如是

失。嗟余幾點淚。至汝已為枯。

四弟前年歿。汝曾多苦辛。何期春草夢。同是夜臺人。鴈斷嗟難續。淚痕今復新。可憐

羣季盡。於我更誰親。

去歲秋多病。吾為徹夜看。倉皇未解帶。辛苦勸加餐。前日心空喜。今朝淚竟彈。廿年

成底事。嗚咽為題棺。

況我岑溪住。迢遙水幾重。生猶愧相養。死豈得重逢。愁絕臨岐日。聲聲祇望儂。夜來

雖有夢。至竟杳無蹤。

大義由來重。成童禮勿殤。還當遣幼子。為爾奉盂嘗。再擬佳城卜。安居在北邙。白楊

衰草路。從此日茫茫。

悼女

不幸為吾女。飢寒累汝多。九年空撫養。三日竟沉疴。

汝病纔三日

爾母心情苦。朝來涕泗

沱。有魂如可返。短夢冀相過。

知爾今朝去。能蒙大母憐。好將嬉戲具。為置老人前。況有新忘叔。相依共九泉。夜臺

匪寂寞。吾意轉安然。

寄吳小南張古村都中

相知寥落感天涯。翹首京華起嘆嗟。濡水獨嫌孤有尾。營巢翻羨燕無家。江湖葭莢當秋盛。風雨江鄉入夢賒。聞說清時容卧病。可曾回首故園花。

三十生辰歌

時乾隆甲寅

白日如駒隙。青春不復再。少壯勿如人。老大徒悲慨。屈指光陰已半生。鬚髯蝟磔嗟無奈。今朝天宇絕纖塵。懸弧令節韶光媚。細雨輕雲花影寒。烟條露萼鶯聲碎。兒童競說古花朝。係二月十五日稱觴客在湘簾外。撲蝶聊為結伴遊。剪綵合作尋春會。花月良緣誰主持。領袖羣芳歸我輩。為憶當年年少時。聰明頗抱超人姿。十三十四習翰墨。十五十六工文詞。自謂置身必榮戟。意態歷落人爭識。驚馬寧空冀北羣。溟鵬不鍛摩天翻。倏忽年來事變遷。隆冬讀禮心茫然。三載光陰疾如箭。阿母又復遊重泉。西華賓客多忘舊。吳祐行吟竟辱先。行年二十忽習武。躍馬彎弓氣如虎。攀龍附驥云有期。牧豕屠狗皆堪伍。景畧何妨捫蝨談。劉琨不覺聞雞舞。轉眼相看二十五。飄然為住江之浦。小人學圃非有心。君子躬耕傳自古。一椽茆屋縱清閒。天賦三生太孤苦。羣李俊秀皆惠連。謂雨時紹初二弟忍看玉樹埋黃土。今年三十尚窮愁。蕭疎兩鬢空沉

浮。李廣功名知有命。向禽婚嫁徒耽憂。人生年歲恒迫促。古來賢詰追芳躅。將軍慷慨執金吾。癡王才藻推華族。陸據新傳聲譽隆。含文已作徐兗牧。枉說英流同調多。唾壺擊碎行高歌。匣中長劍流孤影。簾前明月生微波。如此年華如水逝。卅年虛擲凌霄志。眼中楊意更何人。寥落青衫成底事。我聞尚父釣渭濱。一朝吐氣如有神。況我青年未衰老。逢時行可施經綸。特恐天心不我厚。茫茫前路空搔首。烹羊宰牛聊為樂。佩衡攀蔭傷心久。勿學江邊九辨歌。漫飲花前一杯酒。

村居

一椽新卜築。詩酒靜堪娛。林壑聊藏拙。谿山總號愚。亂雲常帶溼。淺水遠通湖。悟得閒中趣。田園自不蕪。不入塵囂境。村居任展舒。天高窺月小。雲斷漏星疎。有菊還攜酒。多愁合著書。擬隨羊仲侶。為結舊茆廬。

昨閱舊稿中。有四五語為前人道過者。豈以所見畧同。不謀而合耶。抑摘錄之餘。與自稿並存。忘而贗登耶。又或未能割愛。襲為己出耶。事隔數年。已茫不記憶。故賦以自嘲。

摩詰咏黃鸝。東坡吟江水。古人造句時。多與前賢似。沿襲豈素心。偶一為之耳。英雄

見則同。擬議從茲始。學詩學古人。所學寧在是。昨檢囊中篇。間拾人牙齒。物我渾未分。憤憤何至此。事久偏已忘。佳句實所恃。或云推敲餘。理當訂亥豕。過則勿憚改。斯為有志士。吾曾再三思。開函復審視。瑕疵殊苦多。徒累管城子。即使仍其舊。坦然亦無恥。本以托衷懷。非冀譽與訾。苦吟二十年。略識風騷旨。廬山自有真。知音良可俟。

寄沈諧堂

一別江鄉久未還。可能猶駐舊容顏。十年詩酒留殘夢。兩地尊鱸話故山。人比彩雲真易散。愁如春草最難刪。初明此後腸休斷。歸與浮家烟水間。

畫隱歌為東橋作

昔聞唐景卿。蓬蒿滿宅何淒清。又聞高道興。運筆神速千人驚。古來高隱盡超絕。五百年後復有東橋生。破屋三楹號水鏡。紅塵不到天墉城。情懷跌宕氣宇宏。閉門獨攢軒裳榮。鼎彝列左右。鉛槧任縱橫。細品顧渚茶。暇繙楞伽經。或栽蘇牙樹。或吹彩鳳笙。閒雲瘦鶴來訂盟。此身原係蓬萊精。不受俗眼青。不偷榜上名。不憂三旬九食苦。不緣家事晝夜心營營。維愛宣和譜。珍之如百朋。興酣潑墨臨粉本。十日五日聲價增。吳山縹緲兮越岫崢嶸。芒屨所到遊心兵。以意繪寫即造形。料是胸中貯邱壑。得心應手手更靈。故能譟然抉出空山危石真性情。前日同居為鄰好。肥魚大酒常

四言金卷八
歡迎。我因作詩窘。搜腸搖膝。咿咿鳴。君乃作畫狂。揮毫落紙聲鏗。既相得復相惜。世人驟見眼頻瞠。鰓鰓竊議笑且輕。爾我聞之不介意。大呼拍手傾湘醺。比來相違咫尺。水夢魂時繞簷簷亭。今朝無詞贈君。又手成。不知可否換得八尺紅研綾。

幽居書事

笑酌醪醑酒一杯。晚來不放玉山頽。折殘垂柳絲難定。立盡東風花未開。紫燕帶泥衝霧去。青蜓馱雨過牆來。於今略得幽閒趣。蘿薜為衣許我裁。小桃如慢雨如絲。貧賤襟懷祇自知。繭紙閒臨飛白字。雞窗細詠比紅詩。隔簾風定花開早。遠徑春寒鶴下遲。欲撫瑤琴寫衷曲。斷腸何計慰相思。翩翩文彩可憐生。瘦減腰圍體更輕。徒說歡容留鏡匣。虛將綺思問簫聲。樓前柳絮真無賴。簾外春風又薄情。賸有登臨濟勝具。芒鞋竹杖自閒行。日暮懷人倚畫欄。蒼芒意緒更闌珊。偶依明月攀花立。自寫新詞剪燭看。紙帳有情添午倦。竹鑪無力戰輕寒。琴歌酒賦凋零盡。檢點青衫淚未乾。人生枉說住江南。萬種愁腸是舊諳。三月魂消同蜀鳥。再眠身起似吳蠶。女兒香贈煙千縷。梔子花開葢半含。到底情悰消未盡。有人樓上共清談。辛苦銅烏報曉籌。輕烟冉冉煬寒篝。喜無車馬喧蓬戶。自有星蟾照小樓。十載因依